

Bosna i Hercegovina  
Federacija Bosne i Hercegovine  
OPĆINA VISOKO  
Općinsko vijeće Visoko

PREDMET: Inicijativa za ispitivanje zakonitosti Odluka  
Vijeća općine Visoko br. 01/2-012-218/97  
i broj 01/2-012-217/97 od 12.09.1997.godine

Vijeće općine Visoko je donijelo odluku br. 01/2-012-217/97 od 12.09.1997.godine o izmjeni i dopuni Odluke o organizovanju Javnog preduzeća "Aerodrom Visoko" u Visokom.

Navedena Odluka nije pravno validna, jer je donijeta na osnovu člana 5. Zakona o preduzećima, kako se navodi u uvodu Oduke. Obzirom da se radi o javnom preduzeću čiji je osnivač Općina, sve statusne i druge promjene i pitanja vezana za navedeno preduzeće su trebala biti donijeta u skladu sa Zakonom o javnim preduzećima ("Sl. list R BiH", br. 4/92, 21/92 i 13/94).

U članu 10. stav 2. iste Odluke se navodi da su organi upravljanja preduzećem Skupština, Upravni i Nadzorni odbor. Medjutim, članom 10. Zakona o javnim preduzećima je propisano da su organi upravljanja i rukovodjenja javnog preduzeća Upravni odbor i direktor, a ako se organizuje kao preduzeće u mješovitoj svojini, obrazuje se skupština javnog preduzeća u skladu sa zakonom i statutom javnog preduzeća.

Sem naprijed navedenog, treba istaći da je članom 11. Zakona o javnim preduzećima propisano da članove Upravnog odbora imenuju osnivači srazmjerno osnivačkom udjelu u javnom preduzeću a da se članom 19. istog zakona propisuje da se kontrola ispunjavanja javnih interesa vrši podnošenjem godišnjih izvještaja o poslovanju javnog preduzeća, prije kojih se obavezno varši revizija računovodstvenih iskaza javnog preduzeća saglasno zakonu, što je vezano za navedeno javno preduzeće izostalo u predhodnom periodu.

Vijeće općine Visoko je na istoj sjednici od 12.09.1997.godine donijelo Odluku broj 01/2-012-218/97 o promjeni osnivača i osnivačkog uloga Javnog preduzeća "Aerodrom Visoko". U članu 1. Odluke se navodi da se preduzeće Bosanska investiciona organizacija d.j.l. Sarajevo prihvata kao suosnivač sa osnivačkim kapitalom od =37.600.950,00 DEM, prema procjeni ovlašćenog sudskog vještaka, a u članu 2. navedene Odluke vrijednost Javnog preduzeća "Aerodrom Visoko" (kapital osnivača) iznosi =18.342.000,00 DEM, što kako se navodi u članu 3. Odluke čini ukupni kapital javnog preduzeća u iznosu od =55.942.950,00 DEM.

Vezano za navedenu Odluku postavlja se pitanje vjerodostojnosti i tačnosti nalaza i mišljenja vještaka, obzirom da vrijednost kapitala općine Visoko obuhvata zemljište koje prema podacima Općinske službe za geodetske, imovinsko-pravne poslove i katastar nekretnina obuhvata zemljište na kome "KTK - Visoko" ima pravo raspolaganja 1/1.

Polazeći od Ustava Zeničko-dobojskog kantona ("Sl. novine Federacije BiH", br. 7/96), Zakona o lokalnoj samoupravi ("Sl. novine ZE-DO kantona", br. 13/98), Statuta općine Visoko ("Sl. glasnik općine Visoko", br. 4/99), Zakona o javnim preduzećima ("Sl. list SR BiH", br. 4/92, 21/92 i 13/94) u cilju nadzora i zaštite lokalne samouprave i poštovanja i dosljedne primjene zakona i zaštite opštih i zajedničkih interesa, predlaže se Općinskom Vijeću Visoko da se ispita zakonitost donijetih odluka i izvrši revizija vještačenja koje se sastoji iz procjene radova, zemljišta, kapitala suosnivača i osnivača, te u smislu naprijed navedenog nužno je preduzeti određene aktivnosti.

Prilog: Plana aktivnosti

Načelnik općine

Faruk Salićinović

## PLAN AKTIVNOSTI

Aktivnosti i mjere koje treba poduzeti u okviru ispitivanja zakonitosti Odluke općine Visoko vezanih za Javno preduzeće "Aerodrom Visoko" i zaštite opštih interesa su sljedeće:

1. Donošenje odluke o stavljanju van snage Odluke Vijeća općine Visoko broj 01/2-012-218/97 o promjeni osnivača i osnivačkog uloga Javnog preduzeća "Aerodrom Visoko" ("Sl. glasnik Općine Visoko", br. III / 97 od 12. septembra 1997.godine).
2. Uputiti dopis Kantonalnom ministarstvu pravde Zeničko-dobojskog kantona radi dostave informacija koliko se predmeta Javnog preduzeća "Aerodrom Visoko" nalazi u postupku kod Općinskog i Kantonalnog suda.
3. Uputiti dopis Kantonalnom sudu Zenica, Odjeljenje za registracije da ne vrši nikakve radnje vezane za registraciju i statusne promjene Javnog preduzeća "Aerodrom Visoko".
4. Uputiti dopis agenciji za privatizaciju ZE-DO kantona da ne preuzima nikakve aktivnosti vezane za postupak privatizacije Javnog preduzeća "Aerodrom Visoko".
5. Donijeti rješenje o imenovanju Upravnog odbora Javnog preduzeća "Aerodrom Visoko".
6. Uputiti dopis "KTK - Visoko" radi dostavljanja informacije o vlasništvu "KTK" nad zemljištem kojim raspolaže Aerodrom ili postojanje eventualnih ugovora u pogledu promjene vlasničkih odnosa na parcelama Javnog preduzeća "Aerodrom Visoko".
7. Federalnoj Vladi, odnosno premijeru uputiti dopis radi dobijanja informacije, dali su određena resorna ministarstva R BiH svojevremeno donosila bilo kakve akte ili odluke vezane za Javno preduzeće "Aerodrom Visoko".
8. Uputiti dopis Službi za geodetske, imovinsko-pravne poslove i katastar nekretnina Općine Visoko radi dostave podataka eksproprijisanog zemljišta za izgradnju Aerodroma.
9. Tražiti izvještaj o poslovanju Javnog preduzeća "Aerodrom Visoko" od momenta osnivanja do 31.12.2000.godine (sa dostavljanjem godišnjih obračuna).
10. Izvršiti reviziju knjigovodstvenih i svih poslovnih knjiga od osnivanja Javnog preduzeća "Aerodrom Visoko" do 31.12.2000.godine.
11. Tražiti od nadležne službe odnosno sekretara Općine Visoko dostavu podataka o suosnivaču - Bosanska investiciona organizacija d.j.l. Sarajevo, ul. Branilaca br. 20., odnosno Rješenje o registraciji broj UE/I-2744/96 (reg.ul. br. 1-16869) kod Višeg suda u Sarajevu.
12. Izvršiti ponovnu procjenu osnivačkog kapitala Bosansko investicione organizacije d.j.l. Sarajevo.
13. Tražiti da se izvrši finansijska kontrola o sticanju i izvoru sredstava kapitala suosnivača, Bosansko investicione organizacije d.j.l. Sarajevo.

Na osnovu člana IV 2 (2) Ustava Federacije Bosne i Hercegovine ("Službene novine Federacije BiH", br. 1/94 i 13/97), člana 68. Ustava Zeničko-dobojskog kantona ("Službene novine Federacije BiH", 7/96), člana 22. Zakona o lokalnoj samoupravi ("Službene novine Zeničko-dobojskog kantona", br. 13/98), Zakona o javnim preduzećima ("Službeni list R BiH", br. 2/92, 21/92 i 13/94), člana 61. Statuta općine Visoko ("Službeni glasnik općine Visoko", br. 4/99 i 6/99), Općinsko vijeće Visoko, na sjednici održanoj \_\_\_\_\_ godine donosi

## O D L U K U

### Član 1.

Odluka Vijeća općine Visoko broj 01/2-012-218/97 od 12.09.1997.godine o promjeni osnivača i osnivačkog uloga Javog preduzeća "Aerodrom Visoko", stavlja se van snage.

### Član 2.

Ova odluka stupa na snagu danom donošenja i objaviće se u "Službenom glasniku općine Visoko".

Broj: \_\_\_\_\_  
\_\_\_\_\_ godine  
V i s o k o

PREDSJEDAVAJUĆI  
Općinskog vijeća Visoko

-----